



KENYATAAN MEDIA

KUALA LUMPUR (7 FEBRUARI 2024) — SUHAKAM memuji inisiatif Kedutaan Besar Indonesia dalam pengurusan proses pengundian Pemilihan Umum Indonesia 2024 (PEMILU) di Malaysia. Penubuhan pusat-pusat pengundian di seluruh Malaysia pada 12 Februari 2024 mencerminkan nilai-nilai demokrasi yang kukuh antara kedua-dua negara.

Hubungan baik antara Malaysia dan Indonesia berakar umbi daripada sokongan dan kerjasama, terutamanya dalam pemeliharaan proses demokrasi. Kerjasama ini adalah komponen penting bukan sahaja dalam hubungan bilateral tetapi juga sebagai sebahagian daripada komuniti ASEAN yang komited dalam pengukuhan budaya dan penghormatan hak asasi manusia. Iltizam ASEAN terhadap hak asasi manusia, sebagaimana termaktub dalam Piagam ASEAN dan Pengisytiharan Hak Asasi Manusia ASEAN adalah selaras dengan prinsip-prinsip yang termaktub dalam Deklarasi Hak Asasi Manusia Sejagat (UDHR). Sokongan terhadap proses demokrasi pilihanraya Indonesia yang akan dijalankan di Malaysia ini jelas menggambarkan nilai yang dikongsi bersama.

Adalah penting untuk menekankan bahawa hak mengundi adalah hak asas yang penting untuk tadbir urus demokrasi, penyertaan sivik, dan kestabilan serantau. Meskipun Malaysia tidak menandatangani Kovenan Antarabangsa Hak Sivil dan Politik (ICCPR), prinsip teras Kovenan ini jelas terpamer dalam dedikasi Malaysia terhadap hak asasi manusia dan demokrasi. Artikel 25 ICCPR menyatakan bahawa setiap warganegara mempunyai hak untuk mengambil bahagian dalam hal ehwal negara secara langsung atau melalui wakil yang dipilih secara bebas dan berhak untuk mengundi dan dipilih melalui pilihan raya yang sah. Ini membuktikan bahawa kesejagatan hak mengundi adalah melangkaui sempadan dan juga pegangan politik.

Justeru, untuk memastikan proses pilihan raya Indonesia yang kondusif di Malaysia, SUHAKAM menyeru pihak berkuasa untuk membantu kelancaran proses pilihan raya tersebut. Ini seharusnya mencerminkan prinsip-prinsip yang terkandung dalam Piagam ASEAN, Deklarasi Hak Asasi Manusia ASEAN sebagaimana yang terangkum dalam Deklarasi Hak Asasi Manusia Sejagat (UDHR) sepertimana yang dicadangkan dalam model PEMILU melalui kepelbagaian pusat pengundian untuk Pemilihan Umum Indonesia 2024. Dengan pilihan raya yang bebas, adil, dan tanpa halangan, Malaysia menunjukkan nilai dan komitmen terhadap hak asasi manusia, demokrasi serta solidariti melalui sokongan serantau kepada negara jiran.

SUHAKAM menggalakkan rakyat Malaysia untuk memberi sokongan kepada peristiwa penting ini dan memupuk semangat muhibah dan perpaduan dalam Komuniti ASEAN. SUHAKAM mengucapkan selamat mengundi kepada semua pengundi warganegara Indonesia di Malaysia. Penglibatan ini adalah sumbangan yang signifikan kepada proses demokrasi serantau dan mencerminkan komitmen kedua-dua negara dalam menegakkan hak asasi manusia dan prinsip demokrasi.

-TAMAT-

**Suruhanjaya Hak Asasi Manusia Malaysia (SUHAKAM)
7 Februari 2024**